

# Superinfo

22.12.2016. / broj 178

**Čestit Božić  
i sretna Nova  
2017. godina**



VLATKA LUKIĆ  
PREDSEDJAVAJUĆA  
OV TRAVNIK



CABARET WINTER  
FEST ZENICA



TRADICIONALA  
GRAHIJADA



ZENICA PODRŽAVA  
PROJEKTE N/Fs BIH



## PODRŠKA BUDŽETIMA

Skupština ZDK većinom glasova, sa 25 glasova ZA i tri glasa protiv, prihvatile je rebalans ovogodišnjeg, te Nacrt budžeta za narednu godinu. Prema objašnjenju ministra finansija Andreja Kajića, rebalans budžeta proistekao je zbog promjena kako u prihodovnoj tako i rashodovnoj strani, a razlika u odnosu na planirani budžet je 1,87 miliona maraka. Budžet ZDK za 2017. godinu je blizu 296 miliona KM. Podršku predloženom Nacrtu budžeta ZDK za 2017. godinu osim zastupnika SDP-a dali su svi ostali poslanici, među kojima i DF-ovi, iako amandmani aktuelne predsjedavajuće Skupštine Draženke Subašić vezano za rebalans budžeta nisu usvojeni.

## PODRŠKA ZA FARME

Vlada ZDK, na prijedlog Ministarstva za poljoprivredu, šumarstvo i vodoprivredu, odobrila je proizvođačima sa područja ZDK isplatu sredstava u iznosu od 255.000 KM na ime podrške za farme muznih grla registrovane po Zakonu o obrtu. U 2015. godini poticajna sredstva iz Budžeta Kantona iznosila su 400 KM po grlu i odobrena su za 27 registrirane farme muznih grla, što je u 2016. godini dovelo do povećanog interesa farmera da registruju svoje farme. U 2016. godini broj registrovanih farmi se povećao na 66 i za njih je isplaćen gore navedeni iznos. Na istoj sjednici, kantonala Vlada je na prijedlog Ministarstva za poljoprivredu, šumarstvo i vodoprivredu odobrila organizatorima sajmova i izložbi isplatu sredstava u iznosu od 16.000 KM za predstavljanje domaće poljoprivredne proizvodnje.

# KREDIT ZA BOLNICU



Kantonalna bolnica Zenica nedavno dobijenim dugoročnim kreditom uspjela je otplatiti sva dugovanja koja su imali prema dobavljačima. Prema riječima njenog prvog čovjeka, direktora Rasima Skomorca, jedna je od rijetkih zdravstvenih ustanova u našoj zemlji koja nema nikakvih dugovanja prema fondovima. - Stanje koje sam zatekao u bolnici kada sam došao za direktora bilo je izuzetno teško. Bili smo opterećeni ogromnim dugovanjima prema našim dobavljačima, imali zaustavljen operativni program gdje su se radile samo hitne stvari, imali na dnevnoj bazi otežano snabdjevanje svim lijekovima i materijalima koji su potrebni za rad. Sagledavajući takvu situaciju, mi smo krajem prošle godine ušli u jedan revolving kredit od 2,5 miliona KM da bismo barem nakratko te stvari popravili, kazao je Rasim Skomorac. On je objasnio da su tada vratili operativne programe, podigli snabdjevanje lijekova na rezervu od bar sedam dana, obezbjedili redovno funkcionisanje ustanove u svakom pogledu i izbjegli da pacijenti budu

ugroženi zbog toga. Početkom ove godine, Skupština i Vlada Zeničko-dobojskog kantona su dale saglasnost bolnici da se ide u realizaciju dugoročnog kreditnog zaduženja na osnovu dugovanja bolnice koja su iznosila oko 16 miliona maraka. Nakon provedenih procedura kredit je realiziran i skoro je završena isplata svih dugovanja. - Prvi smo u BiH od zdravstvenih ustanova koji smo na ovakav način rješili dugovanja. Dobavljači su nam jako zahvalni. Kroz pregovore koje smo sa njima imali, većina ih je pokazala veliko razumijevanje i oprostila kamate, a neki čak dali i dodatno rabat na ukupni dug, na čemu smo im zahvalni. Kaknjskom "MGM"-u kao najvećem dobavljaču lijekova smo bili dužni 2,6 miliona KM, a sarajevskom "Diamedic"-u kao najvećem snabdjevajuću medicinske opreme dva miliona KM. Ne samo, dakle, da nisu aktivirali naplatu nego su se odrekli zateznih kamata i dali rabat. Na osnovu odricanja zateznih kamata čije smo plaćanje izbjegli i dobijenog rabata, obezbjeđena je ušteda od 3,1 miliona KM, istakao je Skomorac.

## AKCIJA ČIŠĆENJA

Dvadesetak ljubitelja prirode, članova Planinarskog društva "Čolan" iz Zenice, uz dobru logističku podršku, pet malih motokultivatora i Koletovu skip- mašinu uklonili su tone različitog otpada uz planinarsku stazu od Vrdila iznad sela Brznik do Čolana. Veći dio otpada deponovali su na jedno mjesto odakle je planiran odvoz Albinim mašinama na deponiju Mošćanica, a onečišćeno zemljишte su propisno kultivisali. Područje uz livade i kroz borove i smrče nakon ove akcije je sada mnogo bolje, lješće, čišće, uređenije i zdravije, pogotovo za pješake.



Samo da još lokalno stanovništvo Brznika i Varde u ovome vide put i način ekološkog osvješćenja i napretka, jer zdrava životna sredina nema alternativu.

# VLATKA LUKIĆ PREDSJEDAVAJUĆA OV TRAVNIK

Vlatka Lukić iz Hrvatske koalicije za Travnik nova je predsjedavajuća Općinskog vijeća Travnik. Ona je izabrana jednoglasno na konstituirajućoj sjednici Općinskog vijeća Travnik. - Očekujem dobru saradnju sa načelnikom općine i pomoćnicima načelnika, kao i sa svim vijećnicima. Očekujem da radimo u interesu građana od kojih smo dobili povjerenje i da radimo na daljem razvoju grada Travnika, kazala je Lukić.

Na konstituirajućoj sjednici verifikovani su mandati 31 vijećnika iz novog saziva OV Travnik u kojem Stranka demokratske akcije (SDA) ima 12 vijećnika, Hrvatska koalicija za Travnik 9, Savez za bolju budućnost (SBB) 4, Socijaldemokratska partija (SDP) 3, Koalicija SBiH, LDS i BOSS 2 i Demokratska fronta (DF) jednog vijećnika. Mislim da će ovaj saziv Općinskog vijeća Travnik ići korak dalje u ekspeditivnosti i u razvoju, jer Općina



Travnik je krenula jednim razvojnim pravcem. Mislim da je ovaj sastav vijeća zreo za jednu takvu aktivnost, a vrijeme će sigurno pokazati da to možemo. Nastojat ćemo da uradimo još bolje stvari za građane Travnika i da ova sredina postane još bolja za život njenih građana, izjavio je novinarima Admir Hadžiemrić, načelnik općine Travnik.

## KAKO POBOLJŠATI LOKALNO OKRUŽENJE ZA INVESTICIJE?



Federalno ministarstvo razvoja, poduzetništva i obrta organizovalo je u Vitez konferenciju pod nazivom „Regulatorna reforma u funkciji privlačenja investicija i jačanja lokalnog ekonomskog razvoja“. Konferenciju je otvorio federalni ministar razvoja, poduzetništva i obrta Amir Zukić, a u radu konferencije učestvovali su načelnici općina i gradonačelnici iz Federacije BiH. Cilj ove konferencije je, kako je rečeno, da se prezentiraju mehanizmi ponuđeni konceptom regulatorne reforme i lokalnog ekonomskog razvoja. Kroz projekt „Poboljšanje lokalnog okruženja za investiranje – LIFE“ u BiH je prošlo 25 općina u BiH, istaknuo je Tarik Šahović, vođa projekat LIFE.

-Trenutno projekat LIFE pokriva 20 općina u naredne tri godine. Nismo u mogućnosti biti u svim općinama, ali uz pomoć Federalnog ministarstva razvoja, poduzetništva i obrta pokušavamo prenijeti tehnologiju na ostale općine, kazao je Šahović. Na konferenciji su predstavljeni i neki od uspješnih primjera jedinica lokalne samouprave u Federaciji Bosne i Hercegovine u kojima se implementira projekt „Poboljšanje lokalnog okruženja za investiranje – LIFE“. Cilj projekta i konferencije koju je organizovalo Federalno ministarstvo razvoja, poduzetništva i obrta jeste „olakšati život privrednicima“. - Kroz reformu koju pripremamo zajedno sa Svjetskom bankom, IFC-om i u saradnji sa općinama pokušat ćemo „olakšati život privrednicima“, da od ovih 150 do 200 papira koje oni trebaju da izvade da bi počeli sa biznisom bude puno manje, da se puno jeftinije i puno brže dobijaju, kazao je federalni ministar razvoja, poduzetništva i obrta Amir Zukić, naglašavajući da ljudi idu tamo gdje im je lakše funkcionisati i disati.

## NAČELNIK BREZE NA KONFERENCIJI U VITEZU



Federalno ministarstvo razvoja, poduzetništva i obrta organiziralo je Konferenciju pod nazivom „Regulatorna reforma u funkciji privlačenja investicija i jačanja lokalnog ekonomskog razvoja“ koja je održana u prostorijama Franšiznog centra u Vitezu. Konferenciju, namijenjenu načelnicima općina i gradonačelnicima s područja FBiH, otvorio je Amir Zukić, federalni ministar razvoja, poduzetništva i obrta. - Pojednostavljuvanje administrativnih procedura jedan je od uvjeta za stvaranje pozitivne poslovne klime i privlačenje investitora, zaključeno je na konferenciji u Vitezu, kazao je načelnik općine Breza Munib Zaimović.

## PRODAJNA IZLOZBA

U prostorijama Gradske galerije u Vitezu održana je prodajna izložba radova korisnika Udruženja građana za podršku osobama u duševnoj nevolji MOST Vitez i klijenata Okupacione terapije. Izložbi su prisustvovali Općinski načelnik Tomislav Bošnjak Matić, predstavnica Odjela za društvene djelatnosti, predstavnici obrazovnih i zdravstvenih institucija, kao i mnogobrojni građani i građanke Općine Vitez. Prisutne su pozdravili voditeljica CMZ-a Klimentina Nuk-Vuković te predsjednik i dopredsjednica Udruženja MOST Edin Hodžić i Sanja Vidović koji su naglasili važnost borbe protiv predrasuda o osobama sa mentalnim poteškoćama koje su duboko ukorijenjene u našem društvu.



## DRUŽENJE GRAĐANA

U organizaciji Saveza slovenačkih društava „Evropa zdaj“ u Bosni i Hercegovini i Udruženja građana slovenačkog porijekla „Encijan Zenica“ u Zenici je održano prvo druženje Slovenaca i građana slovenačkog porijekla u BiH. Prije početka manifestacije otvorena je izložba izabranih radova sa tradicionalne „Regionalne likovne kolonije u Tuzli“ na kojoj će radove, njih 40, predstavilo 17 autora, slovenačkih i bh. slikara. Prema riječima Dragana Gačnika, predsjednika Encijana na zabavi u zeničkom Domu penzionera družilo se 170 članova udruženja iz Banja Luke, Tuzle, Sarajeva, Kaknja, Breze i Doboja. Na zabavi su nastupili hor „Slovenčice“, te folklorna grupa i orkestar iz Kaknja.



# ZAŠTITA VODE MORA BITI USTAVNA KATEGORIJA!

Ako ustavne kategorije mogu biti naknade poslanika, nacionalna struktura vlasti i razvoj turističkih resursa, onda i zaštita vode, kao najvažnijeg prirodnog resursa kojim trenutno raspolažemo, mora biti ustavna kategorija, tvrdi Zeničanin Samir Lemeš, poslanik u kantonalnoj Skupštini koji je u ime Kluba poslanika Demokratske fronte uputio prijedlog amandmana na Ustav Zeničko-dobojskog kantona.

Prema njegovom prijedlogu amandmanom LXII iza člana 10. Ustava dodaje se novi član: „Sve osobe na teritoriji Kantona uživaju pravo na pitku vodu kao univerzalno ljudsko pravo. Vodenih resursa su javno dobro kojim upravlja država. Vodenih resursa se primarno i trajno koriste kako bi građani imali pitku vodu i, u tom smislu, nisu tržišna roba, te ne mogu biti predmet privatizacije“. - Voda je ograničen prirodni resurs i osnova života i zdravlja. 2002. godine, Svjetska zdravstvena organizacija procijenila je da 1,1 milijardi ljudi (17 posto globalne populacije) nema pristup izvorima pitke vode. Svakoga dana, 3.900 djece mlađe od pet godina umire od bolesti vezanih za vodu. Bez vode nema ni drugih ljudskih prava (pravo na obra-



zovanje, pravo na odgovarajući životni standard, pravo na hranu). Dakle, pravo na vodu je neophodno za vođenje života dostojnog čovjeka, ali se često uskraćuje zemljama u razvoju, kao i razvijenim zemljama, tvrdi Lemeš uz objašnjenje da nema važnijeg prirodnog resursa na ovoj planeti od vode jer voda održava u životu svaki živi organizam, svaku biljku, svaku životinju i svako ljudsko biće na ovoj planeti i da na isti način kao i bez zraka za disanje, ljudi ne mogu izdržati bez vode više od nekoliko dana. Poznati ekolog iz Zenice naglašava da predloženi amandman ne ugrožava koncesije niti našu privredu već da se time želi da se voda proglaši ljudskim pravom i na taj način da se to zaštititi.

## SASTANAK POSLODAVACA SA GRADONAČELNIKOM ZENICE

Prije nekoliko dana u Zenici je održan sastanak gradonačelnika Zenice Fuada Kasumovića sa članovima Upravnog odbora Udruženja poslodavaca Zenica. Na sastanku je postignut visok stepen saglasnosti o potrebi zajedničke saradnje Gradske uprave na čelu sa gradonačelnikom i Udruženja poslodavaca Zenica na poboljšanju poslovnog ambijenta u Gradu Zenica. Gradonačelnik Fuad Kasumović je kao prioritete u svome radu izdvojio reformu gradske uprave i javnih preduzeća čiji je osnivač Grad Zenica. Giljotina propisa i nameta na nivou Grada Zenica će biti važan korak u poboljšanju poslovnog ambijenta u Gradu Zenica. Zapošljavanje mladih i visokoobrazovanih kadrova i njihov ostanak u Zenici je također jedan od prioriteta u narednom periodu. Zbog toga su Gradu Zenici neophodne investicije domaćih i stranih privrednika,

jer je nova zapošljavanja moguće ostvariti samo u realnom sektoru. Zajednički zaključak gradonačelnika Kasumovića i Udruženja poslodavaca Zenica jeste da privrednici iz Grada Zenica trebaju putem Udruženja poslodavaca Zenica artikulirati svoje zahtjeve, prijedloge, primjedbe i sugestije prema gradskoj upravi radi poboljšanja poslovnog ambijenta u Zenici. Privredni Savjet Grada Zenica je tijelo putem kojeg će u narednom periodu privreda i gradska uprava na čelu sa Gradonačelnikom institucionalno raditi na svim pitanjima koja su u žizi interesovanja privrede.



# PANEL DISKUSIJA



U organizaciji EU info centra u Zenici je održana panel diskusija na kojoj su sudjelovali Edward Ferguson, britanski ambasador u BiH i Anders Hagelberg, švedski ambasador u našoj zemlji, te gradonačelnik Zenice Fuad Kasumović. Povod je obilježavanje Međunarodnog dana borbe protiv nasilja nad ženama – 25. novembra i doprinos kampanji 16 dana aktivizma protiv rodno zasnovanog nasilja. - Ambasadori Velike Britanije i Švedske u BiH su razgovarali sa studentima, nevladinim organizacijama, vladinim institucijama i drugim zainteresiranim grupama o

težini ženskih prava, rodno zasnovanog nasilju i u kontekstu EU integracija što BiH može naučiti od ove dvije zemlje čiji su ambasadori bili na ovom skupu, ali i generalno od EU, kazao je Saša Kulukčija iz EU info centra koji je bio moderator.

Kasumović je rekao da je u Zenici u utrci za gradonačelnika na lokalnim izborima u oktobru pobjedio kao nezavisni kandidat, a da mu je glavni slogan bio "Zenica i bosanska i evropska". Dodao je da je na ovom sloganu i obećanjima koja je dao u kampanji pobjedio sve sisteme.

- Građanima ovog grada a ja se nadam već 2018. godine i države Bosne i Hercegovine je dosta ovih sistema koji čitavo vrijeme gube na budaleštine i neka nacionalna prepucavanja. Omladini treba dobra edukacija i treba im obezbjediti posao. Nacionalna prepucavanja ništa im od toga neće dati. Glasajući za mene građani su pokazali da hoće ovaj grad da bude evropski grad, a vjerujte sve što sam obećao, ja ću i uraditi, istakao je Kasumović.

## POBJEDILI SA INOVACIJOM U OBLASTI OBRAZOVANJA

Ekipa Mašinskog fakulteta Univerziteta u Zenici pobjednik je YEP/IEEE Innovation Hackathona Sarajevo 2016 godine sa inovacijom u oblasti obrazovanja - „PiProjector“. Studenti Univerziteta u Zenici: Harun Hrustić, Armin Bošnjak, Kenan Beganović, Ajla Divoš, Anida Ibrahimagić, Lejla Medić, Nizama Perenda i Ramiz Mujčinović, ponudili su rješenje koje je devetočlani žiri ocijenio najboljom i najperspektivnijom inovacijom u konkurenciji 13 timova sa sedam elektrotehničkih, IT, mašinskih i ekonomskih fakulteta iz čitave BiH. Žiri su činili stručnjaci iz Australije, Kanade, USA, Veličke Britanije i BiH. Pobjednički tim radio je uz podršku mentora mr. sc. Denisa Spahića, višeg asistenta i koordinatora iDEALab centra Mašinskog fakulteta Univerziteta u Zenici.

- PiProjector je uređaj koji je namijenjen učionicama koje posjeduju projektor, a nemaju laptop ili računar sa kojeg bi se upravljalo prezentacijama. Dodatno, PiPro posjeduje i kamera projektor koji omogućava korisnicima ovog uređaja



da rukopis ili crtež sa papira prenesu na platno u realnom vremenu. PiPro je baziran na Raspberry Pi mikro računaru, a posjeduje i 7" (sedam inčni) ekran na dodir, Raspberry Pi kameru, WiFi tastaturu sa touchpad-om, te autonomnu bateriju od 15600 mAh. Kompletno kućište izrađeno je tehnologijom 3D printanja, kazao je doc. dr. Fuad Hadžikadunić, dekan Mašinskog fakulteta UNZE. U Sarajevu je održana Konferencija "The 2016 BiH IEEE Student and Young Professional Congress" pod nazivom "TECHNOLOGY AND INNOVATION FOR A BRIGHTER FUTURE".

# VLADA ZDK



Vlada ZDK je zaključkom donesenim sredinom decembra, na prijedlog Ministarstva za rad, socijalnu politiku i izbjeglice, utvrdila Prijedlog Odluke o statusnoj promjeni - pripajanje Ustanove „Dnevni centar za djecu sa posebnim potrebama“ Maglaj, Javnoj ustanovi Centar za djecu i odrasle osobe s posebnim potrebama ZDK, koji će biti upućen u skupštinsku proceduru. Vlada je na ovaj način još jednom potvrdila značaj aktivnosti koje Ministarstvo za rad, socijalnu politiku i izbjeglice provodi od 2006. godine na razvoju mreže usluga za omogućavanje adekvatne zaštite djece i odraslih osoba s posebnim potrebama na području ovog kantona. Pripajanje Ustanove „Dnevni centar za djecu sa posebnim potrebama“ Maglaj, Javnoj ustanovi Centar za djecu i odrasle osobe s posebnim potrebama ZDK, predstavlja jednu od završnih aktivnosti Ministarstva za rad, socijalnu politiku i izbjeglice koje se provode s ciljem povećanja dostupnosti i jačanja stručnih usluga, kako ranog podsticanja razvoja i rane intervencije za djecu s posebnim potrebama predškolskog uzrasta, tako i dnevnog zbrinjavanja za djecu i odrasle osobe s posebnim potrebama sa područja kantona, te stručne podrške njihovim roditeljima, kroz sveobuhvatno djelovanje Javne ustanove Centar za djecu i odrasle osobe s posebnim potrebama ZDK.



## PODRŠKA MALOM EVELINU

Shvatajući činjenicu da su hitno potrebna novčana sredstva za operaciju sugrađanina, sedmogodišnjeg dječaka Evelina Alajbegovića, uvažavajući stavove građana sa kojima se konsultirao putem Facebook profila Općine Kakanj, načelnik Nermin Mandra je odlučio da se novčani iznos planiran za troškove noćnog programa dočeka Nove 2017. godine na otvorenom uplati u svrhu liječenja ovog dječaka, te da se u okviru dočeka Nove godine organizira samo dnevni program namijenjen djeci. Nakon što je objavljena ova vijest građani su na Facebook profilu Općine Kakanj napisali brojne komentare kojima odobravaju ovaj čin. Jedan od komentara je posebno emotivan: "Vatromet kojeg za Novu godinu neće biti u Kaknju, bit će najveličanstveniji i najljepši na planeti. Vatromet najljepših želja i podrške malom Evelinu", napisala je Radmila Mijatović Mišković.

## POSJETA PREDSTAVNIKA EUFORA

Predstavnici LOT tima EUFOR-a posjetili su Službu civilne zaštite Općine Tešanj i razgovarali sa pomoćnikom načelnika za civilnu zaštitu Mensurom Saletovićem. Razgovarano je o trenutnoj organizovanosti civilne zaštite na području općine Tešanj, kao i aktivnostima iz ove oblasti koje su vođene tokom 2016. godine.

# POPRAVLJA SE SITUACIJA U RMU BREZA

Situacija u Rudniku mrkog uglja Breza je svakim danom sve bolja i bolja, a zahvaljujući ulaganju u široko čelo, početkom naredne godine trebala bi se povećati proizvodnja što će u konačnici donijeti i dodatnu zaradu sa kojom bi ovaj ugljenokop polako krenuo ka izlasku iz krize. - Uz pomoć vladajućeg društva Elektroprivrede BiH i njihovih stručnjaka, generalnog direktora i direktora za proizvodnju, koji su nam dozvolili da napravimo promjenu koncepcije kopanja u RMU Breza, mi već drugi mjesec smo pozitivni u poslovanju. Pokušavamo sprovesti svoje planove i koncem godine ćemo ostvariti plan u obimu proizvodnje što se nije moglo pretpostaviti polovinom godine, kaže Čamil Zaimović, generalni direktor RMU Breza. Kada je u pitanju kvalitet proizvodnje, tj. uglja, on je nezadovoljavajući. Ali, kako veli Zaimović, Rudnik Breza već sad izvršava svoje osnovne obaveze. Ali, sa 1. januarom 2017. kada se budu morale izmirivati sve obaveze, a njih nije malo jer su oko devet miliona KM obaveze prema dobavljačima, oko 60 miliona maraka obaveza prema fondovima, moći će sve servisirati nakon uvođenja novog čela. Naglašava da su ogromni dugovi naslijedeni od prethodne Uprave Rudnika,



takođe i zarobljen kompleks u jami i ogromne hipoteke i pozajmice u bankama koje su preko četiri miliona maraka i više od sedam miliona KM pozajmica koje moraju vratiti Elektroprivredi. - Imamo obećanja od JP Elektroprivreda BiH da će nam pomoći u finansiranju novog mehanizovanog kompleksa koji će biti sličnih karakteristika i ako to čelo bude davalо približno ovakve rezultate znači mi ćemo imati najmanje 50 posto veću proizvodnju. Time bi koncern imao jedan rudnik zdrav na dugoročnoj osnovi poslovanja. Obećanja od menadžmenta, konkretno od generalnog i izvršnog direktora Elektroprivrede je da će u mjesecu januaru biti raspisan tender i u zadnjem kvartalu iduće godine da bi mogli, pošto je rok isporuke pet-šest mjeseci, mogli imati i taj kompleks, ističe Zaimović.

## ZA 83 RADNA MJESTA PRIJAVILO SE 1.439 LJUDI



Kolika je zaintresovanost za zapošljavanjem u Kaknju ali uopšte za posao rudara pokazuje podatak da se na konkurs za popunu 83 radna mjesta u Rudniku mrkog uglja prijavilo 1.439 osoba. - Dobili smo 1.650 koverti. Neki su se prijavili sa više koverti jer je u pitanju devet vrsta radnih mjesta. Kad je komisija sve prebrojala bilo je 1.439 osoba. Uprava

Rudnika je imenovala komisiju i kazala im da kriteriji kojim se komisija treba rukovoditi su da sa Biroa nezaposlenih prvo uzme svu djecu poganulih boraca koji su nezaposleni, a ispunjavaju uslove, a onda svu razliku da popuni demobilisanim borcima koji ispunjavaju uslove, a takođe nemaju posla i na Birou su. Takođe, da četiri mjesta ostave za osobe hrvatske nacionalnosti koji su se prijavili, a na osnovu broja prijava, kazao nam je Kasim Alajbegović, direktor RMU Kakanj. On je pojasnio da RMU Kakanj trenutno ima 1.660 uposlenih, a da se na posao za 83 radna mjesta prijavilo gotovo onoliko koliko ovaj ugljenokop ima zaposlenih.

# SVJETSKI DAN PLANINA



Odlukom Ujedinjenih nacija od 2003. godine, 11. decembar se obilježava kao Dan planina. Planine (gore) u očuvanju naše planete imaju značajnu ulogu u biodiverzitetu, jer predstavljaju stanište bezbrojnih vrsta flore i faune. - Naša domovina po ljepotama planina ne zaostaje za Austrijom koja od planinskog turizma zaradi više od 11 milijardi eura. Međutim, treba biti iskren i reći da je odnos prema planinama kod nas sramotan, tvrdi zenički ekolog Akif Smajlović, član NG Ekološki pokret Otpor. Profesor Smajlović je naveo nekoliko primjera koji to potvrđuju. Prvi je, veli, Igman gdje je napravljeno naselje vikendica zbog čijih otpadnih voda, izvor rijeke Bosne nije za piće. Drugi primjer su Smetovi, izletište Zeničana koji žive ni kriji ni dužni u "kotlini nemogućeg življjenja, gdje je nerazumno odlukom gradskih vlasti ukopano više od stotinu ovaca obojljih od bruceloze i tako, objašnjava, za narednih 50 godina izvore ispod mjesta ukopa učinili zagađenim. Treći primjer je Vranica, uz Prokoško jezero, poznato osim po nestvarnoj ljepoti i endemskim vodozemcima tritonom, gdje je izgrađeno na stotine vikendica. Četvrti primjer je Vlašić, a tamo su, ističe Smajlović, u utrobu planine ugrađene hiljede tona čelika i betona i zauvijek izgubljena ljepota krajolika. - Dalje nabranjanje uništenih

planina gubi svaki smisao. Planine ili gore u svim monoteističkim religijama imaju poseban status iz prostog razloga što su vjerovjesnici /poslanici/ primili objave upravo na planinama. Na žalost, kroz primjer dovišta Lastavica vidimo da vjernici ne poštuju osnovne postulante vjere kojoj pripadaju jer na planini iza sebe ostavljaju stotine tona smeća. Da bi ušla u EU naša zamlja mora staviti pod zaštitu (nacionalni park, park prirode, spomenik prirode) najmanje 16 posto teritorije, a kod nas je trenutno zaštićeno oko tri posto. Upravo zbog toga je neshvatljivo da Park prirode Babina čeka 12 godina imenovanje uprave. Danas kada živimo pod stresom, ostaje nam mogućnost da stavimo ranac na leđa i uputimo se na planinu jer je naučno dokazano da boravak u prirodi smanjuje depresiju za 20 posto, ističe Akif Smajlović.



## DIVLJE JAGODE



Na Trgu Alije Izetbegovića u Zenici će biti organizovan javni doček Nove 2017. godine, koji će zajedno sa "Zimskim čarolijama" upotpuniti cijeli događaj. Novogodišnja manifestacija 31. decembra počinje dječjim programom u 12 sati, a nastavlja se nastupima kulturnih umjetničkih društava, zeničkih bendova, kao i DJ-eva. Zenička publika imati će priliku uživati i uz koncert grupe Divlje Jagode koji će biti održan na samom Trgu u sklopu Novogodišnjeg programa od 22 sata pa sve do ponoći, kada nas očekuje novogodišnji vatromet.

# PARK MIRA

Žepče je od bogatije za još jednu lijepu stvar koja će služiti mladim ljudima, prvenstveno učenicima SMŠ. Naime, u sklopu „Parka mira“ koji je svečano otvoren u krugu Srednje mješovite škole, postavljena je „pametna“ klupa, kao i stol za stolni tenis. Odbor za međureligijsku saradnju Žepče i Misija OSCE-a u BiH obezbijedili su sredstva za solarnu klupu, koja je energetski neovisna zahvaljujući punjenju na solarnu energiju. Klupa će pružiti korisnicima mogućnost bežičnog i USB punjenja elektronskih uređaja. „Nadam se da će ovaj „Park mira“ dobro doći svima nama, a posebno vama učenicima, gdje ćete znati iskoristiti svoje slobodno vrijeme. Vjerujem da ćemo vremenom dodatno proširiti vanjski prostor ispred škole, obzirom da tu mogućnost nemamo unutar same zgrade. Toplo se zahvaljujem svim donatorima koji su učestvovali u postavljanju „Parka mira“, parka tolerancije, parka ljubavi, jer sve što doprinosi vama djeco, dragi učenici, doprinosi i nama kao menadžmentu škole“, kazao je okupljenim učenicima, nastavnicima i gostima, direktor SMŠ Žepče Zijah Malićbegović. „Kaže se - kamen po kamen palaća, projekt po projekt ljepše naše Žepče. Koji god projekt da završimo u Žepču, a ima ih, hvala Bogu puno, bilo da je on ekološki, gospodarski, kulturni, sportski, svaki doprinosi boljim uvjetima nama u Žepču. Pored savremene tehnologije koje ćete vi ovdje koristiti, razgovarajte, družite se i ovu klupu i cijeli park pametno koristite. Na nama je, svim Žepčankama i Žepčacima, da ovaj park mira proširimo na cijelo područje općine Žepče i da multietničku i međureliгиjsku saradnju mi izgrađujemo i da po tome budemo primjer svima u BiH“, istakao je općinski načelnik Mato Zovko.

Želimo Vam uspješnu i sretnu  
Novu Godinu 2017.



# DEMOBILISANI BORCI KOD NAČELNIKA MAGLAJA



Nekoliko demobilisanih boraca posjetilo je načelnika i u razgovoru sa prvim čovjekom Maglaja Mirsadom Mahmutagićem dotakli se položaja koji zapravo imaju na području općine Maglaj, ali i Bosne i Hercegovine. Željeli su znati šta Općina može učiniti za njih i da li status koji imaju u društvu može da se poboljša. Naglasili su kako jedini način da budu svi zadovoljni, jeste da pravo na jednaku pomoći ima apsolutno svako od njih sa istim iznosom,

te da nikako se ne smiju zaboraviti oni koji nikada nisu dobili nikakvu naknadu, a koji su u jako lošoj ekonomskoj situaciji. Mustafa Bešić iz Domisljice i Fikret Delić iz Kopica istakli su da će se tokom svog mandata u Općinskom vijeću boriti kako bi pitanje boraca u konačnici bilo pozitivno riješeno. Načelnik je istakao da njegova pomoći neće izostati i u skladu sa mogućnostima kojima raspolaže dat će sve od sebe da dobiju ono što zaslužuju.

# IZGRADNJA FABRIKE



Predstavnici kompanije "Agroproteinka" Zagreb i kakanske firme "Bioorganika" koju je osnovala pomenuta kompanija, u Kaknju su, na lokalitetu Modrinje, predstavili fabriku čija je izgradnja počela pripremnim iskopnim radovima. Fabrika će vršiti toplinsku preradu životinjskih nusproizvoda sa ciljem proizvodnje animalnih proteina, te životinjske i tehničke masti. Radi se o investiciji firme "Agroproteinka" Zagreb koja je u Kaknju osnovala firmu "Bioorganika" radi realizacije investicije ukupne vrijednosti od oko 20 miliona KM. Izgradnja ove fabrike rezultat je povoljnog poslovnog

ambijenta kojeg je kreirala Općina Kakanj i brojnih pogodnosti koje su osigurane za investitore. U novoj fabrići neće biti spašljivanja animalnog otpada, dakle opasnih dimnjaka, a rad fabrike će se zasnivati na strogom poštivanju zakonskih propisa i normativa Evropske unije koji se odnose na zaštitu okoline. Na početku rada fabrika će zaposliti oko 70 osoba, a u sljedećim fazama i više. Obzirom da će osim fabrike postojati i otkupne stanice na području BiH zaposlenje bi izgradnjom ove fabrike mogao ostvariti i mnogo veći broj nezaposlenih osoba.



## PLATFORMA ZA MIR

Općinski načelnik Mato Zovko sudjelovao je na predstavljanju Dokumenta „Platforma za mir“ u Parlamentarnoj skupštini BiH zajedno sa načelnicima predstavnicima 60 općina i gradova iz BiH, gdje je predstavljena i uručena Platforma za mir, krunski dokument USA-ID-ovog projekta PRO-Budućnost. Predstavljanju platforme su, osim načelnika, prisustvovali ministrica ljudskih prava i izbjeglica BiH Semiha Borovac, ambasadorica Sjedinjenih Američkih Država u BiH Maureen Cormack, kardinal Vinko Puljić u ime Međureligijskog vijeća u BiH, direktor misije USAID-a u BiH Peter Duffy, zastupnici i delegati u PS BiH i članovi Savjetodavnog odbora projekta PRO-Budućnost Lazar Prodanović, Senad Šepić, Diana Zelenika, Martin Raguž, te profesor Nerzuk Čurak, projektni partneri i ostali. U svojim govorima navedeni su istakli važnost izgradnje trajnog mira u BiH, kao ključne prepostavke za prosperitet svake druge vrste u našoj zemlji. U svojim obraćanjima, načelnici Istočnog Novog Sarajeva, Maglaja i Žepča, te gradonačelnik Doboja, Ljubiša Čosić, Mirsad Mahmutagić, Mato Zovko i Obren Petrović, podčrtali su važnost i neophodnost saradnje, otvorenosti, ali i solidarnosti između opština, naroda i građana u BiH. Dodali su i kako je PRO-Budućnost uticala na živote običnog čovjeka, kroz razne aktivnosti provedene u njihovim zajednicama.

# JAVNO-PRIVATNA PARTNERSTVA



Javno-privatna partnerstva kao generator razvoja općina u BiH, naziv je Konferencije koju su u Sarajevu organizovali Centar za edukaciju Pro Educa i Adventis Broker. Na Konferenciji je učestovao i općinski načelnik Suad Huskić, koji je kazao da je Općina Tešanj zainteresovana za ostvarenje projekata javno-privatnog partnerstva budući da ona pružaju potencijal za nove investicije. Naveo je da su već na prvoj radnoj sjednici Općinskog vijeća identifikovani projekti koji će biti predstavljeni potencijalnim investitorima za ostvarenje javno-privatnog partnerstva. Riječ je o projektima toplifikacije, gradnje kulturno-sportskih centara, zatvorenih bazena i nekih drugih infrastrukturnih objekata, naglasio je načelnik Suad Huskić.



# Ljudi su moj grad

U Muzeju grada Zenice je otvorena izložba "Ljudi su moj grad – moj grad, ovdje i sad" zeničanina Zlatana Alispahića Zlaje. Četvrtom samostalnom izložbom Alispahić je najavio inicijativu da Zenica, kad je umjesto Općine postala Grad, ujedno dobije i svoj novi vizuelni identitet, odnosno Grb Grada, koji bi bio drukčiji u odnosu na aktuelni Grb preuzet od Općine Zenica.

**SAMOSTALNI SINDIKAT OSNOVNOG OBRAZOVANJA I ODGOJA  
FEDERACIJE BOSNE I HERCEGOVINE**

## Delegacija sindikata obrazovanja na ETUCE Konferenciji u Beogradu




Redovna regionalna izborno-izvještajna konferencija Evropskog sindikalnog odbora za obrazovanje (ETUCE) održana je u Beogradu od 05. do 08. decembra 2016. godine. Delegaciju sindikata obrazovanja BiH predvodio je Selvedin Satorović, predsjednik SSOOIO FBiH i dopredsjednik SSS BiH, koji je na Konferenciji jednoglasno izabran za člana Panevropskog komiteta ETUCEa. ETUCE je organizacija nastavnika na evropskom nivou koji zastupa i štiti interese nastavnika i djeluje, između ostalog, i prema Evropskoj komisiji. Predstavlja 135 sindikata nastavnika u 45 država sa oko 30 miliona članova, prosvjetnih radnika, svih nivoa obrazovanja.



Decembarskom skupu u Beogradu prisustvovalo je oko 300 delegata iz svih evropskih sindikata obrazovanja koji zastupaju interes više od trideset miliona prosvjetnih radnika.

Služba za informisanje SSOOIO FBiH





# Mladi u Travniku dobijaju Drugu kuću

Zapušteni prostor zgrade u centru Travnika, koja je do prije šest godina bila sjedište Radiotelevizije Travnika, uskoro će zasijati u novom ruhu i sa savim novom namjenom i konceptom. Ideja jedne od najaktivnijih omladinskih organizacija Centra za edukaciju mladih (CEM) je da u ovom prostoru napravi Društveni centar za djecu i mlade „Druga kuća“. Kroz aktivnosti centra djeca i mladi će svakodnevno uživati zdravo i sigurno okruženje koristeći besplatne multidisciplinarnе programe koje će voditi profesionalci.

- Prostor smo dobili na korištenje na period od 15 godina uz uslov da ga adaptiramo. Prostor je zapušten, potpuno devastiran uslijed višegodišnjeg nekorištenja i neodržavanja. Uskoro krećemo sa prvom fazom radova na rekonstrukciji koja podrazumjeva čišćenje i demontažu unutar objekta, kaže nam Adis Arnavutović, izvršni direktor CEM-a. Sama rekonstrukcija iznosiće 131 hiljadu konvertibilnih maraka, a vrijednost investicije je preko 200 hiljada konvertibilnih maraka kada se završi kompleno opremanje prostora.

-Investitor cijelog projekta je CEM iz vlastitih sredstava, te uz podršku donatora IOGT-NTQ iz Švedske i turske općine Sindžan. Želimo zahvaliti načelniku općine i Općinskom vijeću Travnik koje je dalo jednoglasnu podršku za jedan ovakav Centar, ističe Nedim Pripoljac, programski menadžer CEM-a. Vanjski djelovi objekta bit će obnovljeni, ali će zadržati prepoznatljiv izgled, dok će unutrašnjot objekta dobiti sasvim novi, moderni izgled sa brojnim sadržajima. Centar za edukaciju mladih od svog osnivanja pružao je brojne korisne programe mlađim kako u Travniku, tako u srednjoj Bosni i šire. „Druga kuća“ pružit će nove korisne sadržaje, a zapušteni objekat u centru grada dobit će novu namjenu.

## Više korisnika

Zgradu u samom centru Travnika koristila je nekada Osnovna muzička škola, a bila je sjedište Radio Travnik. Ovaj objekat koristili je i Muzičko društvo Travnik, popularna Limena glazba. Kada je osnovana Radiotelevizija Travnik dobila je na korištenje cijeli objekat. Prestankom rada RTV Travnik prije šest godina objekat ostao je napušten i zapušten.



## Imran Kasumović dobjitnik prve nagrade Američke ambasade

Imran Kasumović, student druge godine Fakulteta informacionih tehnologija Internacionalnog Univerziteta Travnik (IUT) dobitnik je vrijedne nagrade i priznanja Američke ambasade u Sarajevu kao jedan od članova pobjedničkog tima koji je napravio društveno korisnu aplikaciju "Scan2Check".

-Svrha ove aplikacije je da korisnik aplikacije putem skeniranja bar koda proizvoda može provjeriti da li je taj proizvod genetski modifikovan, da li u sebi sadrži toksine ili neke druge štetne materije, izaziva li alergije i neke druge NUS pojave, pojasnila su sa Internacionallnog Univerziteta u Travniku. Aplikacija je predstavljena na takmičenju Hackathon – Zajedno postižemo više, koje je na Elektrotehničkom fakultetu Univerziteta u Banjoj Luci čija je osnovna ideja



kreiranje društveno korisnih web i mobilnih aplikacija.

Dio zadatka koji je realizirao naš student Imran Kasumović se odnosio na dizajn za Web, Android i iOS aplikaciju, kao i za prezentaciju cijelokupnog projekta, a za takmičenje je saznao od prošlogodišnje pobjednice, danas asistentice sa našeg IUT-a, magistrice Almedine Hatarić, kažu na Internacionallnom Univerzitetu u Travniku. Ovaj projekt okupio je na jednom mjestu buduće lider civilnog društva, programere, grafičke dizajnere i projekt menadžere željne izazova. Više od 60 učesnika takmičenja prisustvovalo je različitim predavanjima o razvoju softvera te načinima razvoja aplikacija, a bili su i u prilici da se druže i razmjenjuju iskustva sa kolegama i stručnjacima iz cijele BiH.

## Učenici u humanoj misiji



Učenici Elči Ibrahim-pašine medrese Travnik, Katoličkog školskog centra „Petar Barbarić“ Travnik i Mješovite srednje škole Travnik započeli su sa spremanjem prehrabnenih paketa za ugrožene porodice u Travniku, a neće biti zaboravljeni ni najmlađi članovi ovih porodica koji će dobiti novogodišnje paketiće. Ovu humanu misiju učenika tri travničke srednje škole finansijski je podržala Ambasada Sjedinjenih Američkih Država u BiH, pa su tako osigurana sredstva za 24 paketa prehrabnenih namirnica za ugrožene porodice i 60 dječjih novogodišnjih paketića. Inače, učenici ove tri srednje škole učesnici su Programa Access. Riječ je o programu učenje naprednog engleskog jezika koji podržava Ambasada Sjedinjenih Američkih Država u BiH.

# BLAGDANSKO SNIZENJE

AKCIJA TRAJE OD 12.12. DO 31.12.2016. GODINE



33601  
Skoljka WC viseća RIMFREE bijela KOLO NOVA PRO (M33123)  
Stara cijena: 186,00

# Ecos®



Radno vrijeme

08:00 - 18:00 sati

maloprodaja@ecosvitez.ba

+387 30 717 613

[www.ecosvitez.ba](http://www.ecosvitez.ba)

[ecosvitez](#)

030 714 300



42782

Pločasti konvektor 1500 W (30 m<sup>2</sup>-45 m<sup>2</sup>) IP24.

CN03-150 MISTESY

Stara cijena: 116,00

141,00

23379

Tuš kanalica sa nogicama CONFLUO PREMIUM DRAIN LINE 750 (13100005) PEŠTAN

Stara cijena: 160,30

71,50

42794

Samostojeci konvektor TESY 800/1200/2000W

TURBOFAN (36m<sup>2</sup>-42m<sup>2</sup>) CN 203 ZF

Stara cijena: 81,30



42875

Radijator pločasti 22PK IP H600L11000

AIRFEL by DAIKIN

Stara cijena: 195,00

92,00



35800

Tuš set EXUE (EX-G5005)

Stara cijena: 78,40



32472

Umičavajući mizo s podložkom i čekićem IDEAL

STANDARD STRADA U (100x50)

Stara cijena: 279,00

472,50



31432

Kabina tuš s kadom 120 x 90 x 1900 mm

ROCCO

Stara cijena: 537,00

Akcija se ne odnosi na već snizene proizvode. Popust od 18% odnosi se isključivo na gotovinsko plaćanje.




# DOJENJE NA JAVNOM MJESTU

Iako je poznato i znanstveno neosporno da je majčino mlijeko savršena i najbolja moguća hrana za dijete, stopa dojenja na globalnom nivou porasla je od 1995. do 2010. godine sa 32% na svega 39%. Na nivou Bosne i Hercegovine, samo 17,6% majki uspijeva uspostaviti i održati isključivo dojenje u prvih šest mjeseci bebinog života. Niske stope i rani prestanak dojenja imaju značajne negativne zdravstvene i društvene posljedice za djecu, majke i zajednicu, a uz to rezultiraju većim troškovima za zdravstvenu njegu i povećavaju nejednakosti u zdravlju.

## Institut za zdravlje i sigurnost hrane

Zenica pokušava da kontinuirano kroz razne organizirane aktivnosti promoviše značaj dojenja, a s ciljem podizanja svijesti, unaprijeđenja i pružanja podrške majkama koje doje svoju djecu. Nakon pozitivne reakcije javnosti na formiranje prostorija za dojenje u predškolskom dispanzeru JU Dom zdravlja Zenica, ove godine, a kao nastavak ideje o „Prostorijama za dojenje“ Institut za zdravlje i sigurnost hrane odlučio je istu formirati i osposobiti u ugostiteljsko-zabavnom objektu Multiplex Ekrana Zenica. Kako je objekat praćen mnoštvom sadržaja sa zabavom za cijelu porodicu i sve generacije to je bio i pravi izbor za formiranje jedne ovakve prosotorije unutar ovog objekta. Kutak za dojenje ima optimalnu kvadraturu, osnovni namještaj (fotelja, stolić) kao i popratni pribor (korpa za smeće, maramice) te zdravstveno edukativni materijal o značaju i prednostima dojenja.



Nažalost, dojenje u javnosti je još uvijek tabu tema. Očekivati da će se majka zbog dojenja morati na minimum godinu dana skloniti od javnosti ili zadovoljiti dojenjem u javnom wc-u nelogično je i pomisliti. Cilj kampanje je promovirati i osvijestiti važnost dojenja kao i činjenicu da se majke ne moraju skrивati dok doje svoje dijete.

Kada bi žene bile zaštićene od agresivnog reklamiranja zamjena za majčino mlijeko i dojenje efikasnije promovisano, vidjeli bismo više djece koja prezivljavaju i napreduju, sa nižim stopama bolesti i neuhranjenosti.

**Elma dr Kuduzović**

Viši stručni saradnik za socijalnu medicinu  
Institut za zdravlje i sigurnost hrane Zenica

# CABARET WINTER FEST ZENICA

Cabaret Winter Fest 2016. je program koji se ove godine održava u Zenici na dvije lokacije: Trgu Bosne i Hercegovine i Cabaret clubu koji se nalazi na prvom spratu Bosanskog narodnog pozorišta Zenica koje je uz Gradsku upravu Zenice podržalo treće izdanje festivala. Sama ideja o pokretanju "Cabaret Winter Festa" se javila 2014. godine kada je po prvi put organizovan ovaj festival, ali pod nazivom "Snježna kraljica Zenica". - Ove godine idemo s ciljem da zenička zima bude u ravnini s drugim evropskim gradovima. Zbog velikog interesa za programske sadržaje na prošlogodišnjem festivalu, odlučili smo ove godine proširiti program za još 15 dana, kazao je Ivan Petrović, direktor



Festivala i Cabaret cluba i objasnio da ove godine imaju 182 učesnika, 40 više od prošlogodišnje manifestacije. Glumac Haris Burina umjetnički je direktor manifestacije. Prvog dana festivala odigrao je monodramu "Corkan" rađenu po tekstu Ive Andrića. Otvorenie Festivala bilo je 15. decembra istovremeno na obje lokacije, sa otvaranjem likovne kolonije i do sada najveće izložbe grupe od 20-tak zeničkih umjetnika sa više od 200 svojih djela, te

članova organizacije Sumero Sarajevo koja okuplja osobe sa umanjenom psihofizičkom sposobnošću. Takođe će biti izloženi radovi članova udruženja Zvijezda Zenica, tj. osoba poteškoćama u razvoju 28. decembra u 19,30 sati u Cabaret clubu na aukcione-prodajnoj izložbi. I Andrija Petrović, marketing manager Festivala se zahvalio priateljima i sponzorima koji su stali iza ovog festivala, prije svega gradonačelniku Zenice Fuadu Kasumoviću i Gradskoj upravi koji su finansijski podržali ovaj projekat, BNP Zenica, direktoru Hazimu Begagiću i velikom prijatelju Harisu Burini.



Općina Travnik



ČESTIT BOŽIĆ  
I SRETNA NOVA GODINA

Admir Hadžiemrić,  
načelnik Općine Travnik

# DRAM RADOSTI



U povodu 55. godišnjice dodjele Nobelove nagrade Ivi Andriću, u Travniku je izvedena pozornišna predstava "Dram radosti", koja govori o životu i djelima najpoznatijeg Travničanina. Predstava „Dram radosti“ rađena je u produkciji Dječjeg dramskog studija Centra za kulturu općine Travnik i Zavičajnog muzeja Travnik. Ulogu nobelovca Ive Andrića igra Vedad Kerić, a naratori su Emra Mujanović i Adna Dautović. Operateri na grafoскопу su Asadulah Nekemi i Danijal Alibegović. Tekst je napisao Enes Škrgo, a muziku potpisuje Taik Ganić. Saradnik na scenskom govoru je Šaban Mujkanović, inspicijent Lamine Maglić, tehničar Bojan Ljolić, a producent je Oliver Jović.

# DRUŽENJE BEZ POVODA



Druženje bez povoda sa tuzlanskim autorom Nihadom Mešić – Riverom bio je još jedan novi koncept koji je klub „Plava paleta“ upriličio u proteklom periodu. Pod dirigentskom palicom domaćina i književnika Emira Sokolovića večer je protekla ležerno i prirodno gdje se osvrnulo u dijalogu sa gostom na dosta momenata koji se izbjegavaju danas i ovdje; od tog šta je autorski specifikum, po čemu neko djelo ima vrijednost, šta autor misli da je njegov reprezent i slično.

# VIVA FEST

U zgradi HKD "Napredak" Vitez u okviru kulturnog četvrtka pred znatiželjnim učenicima osnovne škole, priateljima i poklonicima filmske umjetnosti prikazano je sedam dokumentarnih filmova sa Viva film festivala 2016. Prisutne su pozdravili i zahvalili na dolasku Marija Grabovac, pomoćnik načelnika za društvene djelatnosti Općine Vitez kao organizator događaja i Zoran Kupreškić, predsjednik HKD "Napredak" Vitez. Osnovne informacije o filmovima koji su prikazani kao i ideju festivala predstavio je Ratko Orozović, filmski reditelj. No,



ova priča ne završava na tome, nego se nastavila filmskim radionicama u kojima su mladi kroz predavanja, vježbe, snimanja i montažu stvoriti dokumentarni film o sebi, svojoj okolini, zaštiti okoliša, događajima i problemima koji nastaju u toj interakciji. Teme proizlaze iz životnih situacija koje ih okružuju, problemima, samoopažanja i mašte.

# SVEČANI KONCERT



Svečanim koncertom na kojem su uručene zahvalnice zaslужnim institucijama i pojedincima Srednja glazbena škola Jakova Gotovca u Novom Travniku obilježila je 20 godina postojanja. Gostima koncerta, učenicima i roditeljima obratila se direktorica škole Ivanka Vrhovac. To je jedina srednja umjetnička škola na prostoru Srednjobosanskog kantona. Tokom dvije decenije u ovoj obrazovnoj ustanovi svoje znanje unaprijedilo je 254 mlađih ljudi od kojih je 53 kasnije završilo muzičke akademije, a neki su stekli zvanja magistara i doktora nauka.

-Ovdje posebno želim istaknuti našeg bivšeg učenika Milana Lucića, koji je prvi doktor klavira u BiH. Trenutno 26 naših bivših učenika studira na muzičkim akademijama u Sarajevu, istočnom Sarajevu, Mostaru i Zagrebu, kazala je

direktorica škole, Ivanka Vrhovac. Trenutno škola ima 55 učenika koji se obrazuju na odsjecima za klavir, harmoniku, violinu, saksofon, klarinet, gitaru i solo pjevanje. Obrazuje ih 15 profesora od kojih su njih devet nekada bili učenici ove škole. Učenici u Srednjoj glazbenoj školi Jakova Gotovca dolaze u Novi Travnik iz svih općina Srednjobosanskog kantona.



# 25 GODINA OMLADINSKOG HORA



"Omladinski hor" iz Zenice, subotnjim je koncertom u BNP-u Zenica obilježio 25 godina aktivnog rada. Prepuna sala je u 60-tominutnom muzičko-scenskom performansu imala priliku na djelu vidjeti jedan od najboljih horova u okruženju koje predvodi profesor Milenko Karović. Na velikoj sceni, Omladinski hor je na spektakularan način izveo mjuzikl „Night fever“. Riječ je o kombinaciji dva nezaboravna mjuzikla i filma, „Groznička

subotnje večeri“ i „Briljantin“. U ovom događaju učešće je uzelo stotinjak mlađih pjevača i plesača. Solisti su bili Merima Mustafić, Alen Seferović, Ajdin Huskić i Ermin Aščerić. - Htjeli smo da vam prikažemo kako su se u mojim godinama tinejdžeri zabavljali. Koliko smo uspjeli to neka ovi stariji procjene, jer ovi mlađi ne znaju kako smo se mi super zabavljali. Ovdje je stotinu mlađih ljudi koji su se svim silama upirali da urade svoj posao

na najprofesionalniji način. Morali smo napraviti predstavu da uživate u onome sadržaju koji pokazuju ova djeca. Za naših 25 godina je mnogo toga učinjeno i meni je drago što je ovako prepuna dvorana i što ste nas pažljivo slušali, a ja se nadam da ćete to činiti i narednih 25 godina, kazao je Milenko Karović i zahvalio se svim prisutnim u dvorani. Ovim koncertom Omladinski hor je zaokružio jednu cjelinu od 25 godina rada. Poslije ovoga u martu će također biti jedan veliki revijalni koncert, a slijedeća godina će cijela biti posvećena ovom velikom jubileju.

Kada je u jesen 1992. godine osnovan „Omladinski hor“, ni njegov osnivač i rukovodilac profesor Milenko Karović, nije mogao naslutiti šta će se nakon 25 godina upornog i mukotrpnog rada dobiti kao rezultat. Jednostavno rečeno, grad Zenica i sama država BiH su dobili istinsku umjetničku, stvaralačku i muzičku instituciju. Okuplajući u ove dvije i pol decenije oko 2.500 članova, Omladinski hor, od vremena kada smo svi bili u „srcu tame“ do ovih dana, uspio je da edukativno kultivise i oblikuje muzički ukus, pomici horizonte očekivanja, te da iznova pokaže da je muzika temelj na kojem se grade ljudski snovi.

VRIJEME POLASKA	STANICE	VRIJEME POVROČA
16:00	SARAJEVO	
17:00	KAKANJ	
17:25	ZENICA	
17:57	ŽEPČE	
18:12	ZAVIDOVICI	
18:42	MAGLAJ	
19:07	DOBOJ	
19:52	DERVENTA	
02:00	LJUBLJANA	16:00
02:30	KRANJ	15:30
03:10	JESENICE	14:50
03:50	VILLACH	14:10
04:15	SPITTAL a.d. DRAU	13:45
05:35	BISCHOFSHOFEN	12:25
06:25	SALZBURG	11:35
08:30	MÜNCHEN	09:30

## POSEBNOST PRISTUPA PACIJENTU U ZAVODU ZA OVISNOSTI



Posebnost pristupa pacijentu u JZU Zavodu za bolesti ovisnosti Zeničko-dobojskog kantona ogleda se u kontinuiranom terenskom radu. Naime, stručnjaci iz ovog Zavoda svake sedmice odlaze u matičnu općinu/opštini ovisnika gdje obave pregled neuropsihijatar, psiholog, socijalni radnik, socijalni pedagog i medicinski tehničar. Od nabrojanog tima stručnjaka formiraju se dva tima. Jedan tim obavlja preglede i savjetovanja u općinama južno od Zenice, a drugi sjeverno od Zenice.

Također, ovisnici u svom mjestu prebivališta dobiju propisanu terapiju. Ovom organizacijom je sistem liječenja maksimalno usmjeren prema pacijentu. Pacijenti mogu sa ovakvim pristupom raditi u nekoj firmi, jer tokom pauze mogu otići do najbliže ambulante i tamo dobiti propisanu terapiju. Pacijenti koji vremenom potvrde pozitivnu opredjeljenost za liječenje ostvaruju pravo i na povlasticu. Dakle, u ovoj ustanovi se maksimalno vodi računa o integraciji pacijenta.

# Tradicionalnom Grahijadom

**otvorena zimska sezona na Vlašiću**

Gastronomskim takmičenjem pod nazivom „Grahijada 2016“ na Vlašiću je otvorena zimska turistička sezona. Bila je ovo druga po redu „Grahijada“ koja je označila početak zimske turističke sezone. Da je ovo gastronomsko takmičenje puni pogodak svjedoči desetak ekipa iz srednje Bosne, od Travnika, Viteza, Busovače do Zenice i Fojnice. Svi su imali svoj „tajni recept“ za omiljeno narodno jelo. Ipak na kraju je žiri proglašio najuspješnije. Najuspješnija bila je ekipa Gorske službe spašavanja Travnik (GSS), drugo mjesto osvojila je ekipa Ski – Busovača, a treće ekipa Apart hotela „Amna“ Vlašić. Travnički spasioci, nakon što su prošle godine osvojili drugo mjesto, ove godine su zablistali i skuhali najbolji grah. Najodgovornija osoba bio je kuhar Zijo. -Tajna dobrog graha je da se stavi što više sastojaka i naravno ima jedan tajni sastojak koji nećemo otkriti, kazao je kuhar Zijo iz pobjedničke ekipе GSS Travnik. Drugoplasirana ekipa pravila je grah na „busovački



način“, a trećeplasirana ekipa imala je recept iz travničkog naselja Karaula. Ipak, pokazalo se da se najbolji grah kuha u centru Travnika! Brojni posjetiocи Vlašića imali priliku probati ove specijalitete, ali dok se grah kuhao jeli su se specijaliteti sa roštilja po kojim je Travnik poznat.



## Praznični kolači-Orašnice



### Sastojci:

- 300 gr oraha,
- 100 gr sjeckanih oraha,
- 100 gr mljevenog suncokreta,
- 6 supenih kašika agave sirupa (ili nekog drugog zdravog zasladića),
- voda



### Priprema:

- Orahe oprati u tri vode i potopiti u vodu osam sati. Potopljene orahe sa sve vodom staviti u blender i dodati mljeveni suncokret, agave nektar po želji. Napraviti kompaktnu masu koju treba uvaljati u krupno sjeckane orahe.

## Kuglice od kokosa i grožđica

### Sastojci:

- 1 šolja grožđica,
- 1/4 šolja bademe,
- 1/4 šolje bundevinskih sjemenki (golica),
- 1/5 šolje suncokretovih sjemenki,
- 2 kašike rogača,
- 4 kašike kokosovog brašna, pola kašice vanilepraznični kolači



### Priprema:

- Namočite bademe i sjemenke u vodi preko noći. Nakon toga ih osušite i dobro izblendajte u mikseru ili blenderu. Dodajte grožđice, rogač, vanilu u prahu i kokos te opet sve izblendajte u čvrstu gustu smjesu. Od smjese formirajte kuglice i uvaljajte ih u kokos.

# RUKOMETAŠI ČELIKA BOLJI OD HERCEGOVINE



U derbiu začelja u okviru 13. kola rukometne Premijer lige BiH, Čelik je na domaćem terenu savjajao Hercegovinu iz Nevesinja sa 32:27. Sto se tiče zeničkih rukometara oni su odigrali posljednju utakmicu pred svojim navijačima u ovom zadnjem kolu jesenjeg dijela prvenstva i nakon zaslужene pobjede idu u mirniju završnicu u drugom dijelu prvenstva. Gosti iz Nevesinja dobro su se držali do sredine prvog poluvremena kada domaći prelaze u vodstvo od 6:5, koje

nisu ispuštali do kraja utakmice. Na kraju prvog poluvremena bilo je 16:12 za domaće. U drugom poluvremenu domaći pojačavaju tempo i u nekoliko navrata imaju i po 8 ili 9 golova prednost, ali su gosti u finisu meča smanjili na minus 5 golova za konačnih 32:27 za Čelik. Najefikasniji u redovima Čelika bili su Begagić i Grahovac sa po 6 golova, dok su se u redovima gostiju sitakli Čabrilović i Draganić sa po 7, te Dragović 6 sa golova.

## ISKRA BOLJA OD ČELIKA



Nakon dva sjajna trijumfa, košarkaši Čelika neočekivano su doživjeli poraz na svom parketu od Iskre iz Bugojna 95:91. Utakmica je odigrana u okviru desetog kola A1 lige i očekivao se trijumf kojim bi zenički košarkaši u potpunosti uhvatili priključak za vodećim timovima, ali ih je u jednoj dosta dobroj utakmici iznenadila Iskra iz Bugojna. Gosti bolje otvaraju utakmicu i vode sa 6:0, ali nakon tri minute domaći prelaze u vodstvo od 11:10, koje su povećavali do kraja prve dionice za 23:16. U drugoj dionici domaći imaju nekoliko puta po 9 poena prednosti (29:20, 31:22, 34:25), ali gosti iz Bugojna uspijevaju u 17. minuti izjednačiti i preokrenuti rezultat na 38:42, a do poluvremena rezultat je 47:45

za Iskru. Treća dionica je protekla u naizmjeničnoj igri, a Čelik trojkom Armina Bilića u zadnjoj sekundi dionice završava treći period sa 69:66. Gosti su posljednjoj dionici preokrenuli rezultat, a domaći su pokušali da sustignu tu prednost, te su na 4,4 sekunde do kraja utakmice došli na minus dva poena (89:91), ali Kurić sa dva slobodna bacanja povećava na 89:93. Za preostalo vrijeme ekipe su postigle po 2 poena za konačnih 91:95 u korist gostiju iz Bugojna. Najefikasniji kod Čelika bili su Bilić 28, Durmo sa 22, te Mešinović i Smajagić sa po 12 poena. Kod Iskre najefikasniji su bili Spasov sa 28, Kurić sa 23, Pandžo sa 15 i Manjgafić sa 13 poena.



## USPJEŠNI PIONIRI ZENIČKE ABECEDE

Mladi košarkaši zeničke Abecede, njihova pionirska selekcija, nastavili su sa uspjesima. Dječaci su ostvarili sve pobjede u regularnom dijelu sezone kao i na nedavno završenom Final fouru Kantonalne lige mladih Zeničko-dobojskog kantona. - Ovo je veliki uspjeh našeg mladog kluba i veliki podstrek za dalje. Ovo je i plod jednog mukotrpnog i vrijednog rada svih trenera u klubu. Ja sam ponosan na sve mlade košarkaše i članove, kazao je Haris Milak, trener u Omladinskom košarkaškom klubu Abeceda, koji je će biti sa svojih 26 godina najmlađi trener na tom nivou u čitavoj Bosni i Hercegovini. Inače, radi se o nekadašnjem mladom reprezentativcu BiH i prvaku naše zemlje u juniorskom i kadetskom uzrastu. Za Abecedu su nastupali u ovoj sezoni: Ajdin Spahić (kapiten), Dino Muharemović, Žinedin Mulić, Miran Kulalić, Rijad Muslić, Osman Spahić, Amer Zec, Enis Halac, Dawud Žigo, Harun Ibrahimagić, Tarik Mujanović, Faris Selimović, Faruk Smrko, Emir Kavaz i Bakir Palkić. Riječ je o dječacima rođenim 2003. i 2004. godine. Omladinski košarkaški klub Abeceda je osnovan u jesen 2010. godine. Vlasnik kluba je cijenjeni košarkaški stručnjak prof dr. Behudin Bajgorić, nekadašnji selektor ženske košarkaške reprezentacije BiH.

# ZENICA PODRŽAVA PROJEKTE N/FS BIH



Gradonačelnik Zenice Fuad Kasumović nedavno se sastao sa predstavnicima Nogometnog/Fudbalskog saveza BiH, predsjednikom Elvedinom Begićem, generalnim sekretarom Jasminom Bakovićem i direktorom Trening centra u Zenici Alijom Porčom. Razgovaralo se o daljoj saradnji Grada Zenica sa krovnom kućom bh. nogometa. Na sastanku je rečeno da se pokazalo da je dosadašnja saradnja bila veoma dobra, da su zajednički realizovani brojni projekti koji su imali za cilj unapređenje sportske infrastrukture i razvoja sporta uopće. Iz N/FS BiH su najavili da su i dalje opredijeljeni da se reprezentativne utakmice igraju na stadionu Bilino polje, a pripreme u Trening centru na Crkvičkom brdu. Gradonačelnik Kasumović je dao punu podršku završetku započetih radova na Bilinom polju, prema zahtjevima FIFA-e i UEFA-e, a koji bi trebali biti gotovi do marta iduće godine. Radi se, o sistemu kontrole naplate ulaznica i ulaska na stadion. Otvorena su i neka pitanja dugoročnih planova Saveza a tiče se proširenja Trening centra N/FS BiH Zenica. Naime, Savez je Gradu Zenica dostavio pismo namjere gdje traže izgradnju trećeg terena i proširenju smještajnih kapaciteta, u skladu s finansijskim mogućnostima. Kasumović je prepoznao dobre namjere Saveza i obećao da će im Gradska uprava u tom pogledu biti na raspolaganju. Prvi čovjek Zenice je rekao da će u skladu sa svojim mogućnostima, Grad Zenica nastaviti da podržava projekte N/FS BiH koji se tiču infrastrukture u Zenici jer "cilj je da Zenica ostane dom reprezentacije BiH". Naravno, i sami igrači naše najbolje nogometne vrste se osjećaju najbolje kada igraju na Bilionom polju.

# ČELIK BOLJI OD ORLOVA, ŽELJO DEKLASIRAO RUDAR

Košarkašice zeničkog Čelika teže od očekivanog slavile su kod kuće nad ekipom Orlova iz Banja Luke u derbi susretu 5. kola Prvenstva BiH rezultatom 74:69 i tako preuzele lidersku poziciju na tabeli sa pet pobjeda iz isto toliko mečeva. Stopostotan učinak imaju i sarajevski Play Off Happy, aktuelni prvak države, koji je pauzirao u ovom kolu, te Jedinstvo BH Telecom koje je u Tuzli savladalo Brčanku sa 73:57. U ostalim susretima 5. kola slavili su, takođe, favoriti. Željezničar je u Sarajevu deklasirao ekipu Rudar Sport iz Ugljevika rezultatom 104:38, Banovići kod kuće Slobodu iz Novog Grada sa 72:52, a banjalučki Mladi Krajišnik na Iliči Impuls sa 81:50. No vratimo se derbiju ovog kola. Najefikasnije u redovima zeničkog tima bile su Aldijana Iriškić sa 19, Anida Čorović sa 15, Sara Heljić sa 11 (uz 18 skokova) i Nedžla Kovačević sa 13 poena, dok su kod gošća brillirale Milena Rađenović sa 25, Nataša Tomasović sa 20 i Nataša Sobot sa 15 poena. Slobodan Bobo Kecman, šef stručnog štaba Čelika nije bio zadovoljan igrom svojih košarkašica.



- Mislim da smo pravili dosta nekih glupih grešaka.

Trebali smo dosta ranije da prelomimo utakmicu u svoju korist. Heljić i Kovačević su bile totalno van utamice, kazao je Kecman. Do pobjede su Željezničar predvodile Zerina Alispahić sa 23 i Dessarea McRoy sa ubačenim 21 poen, Jedinstvo - Jasmina Ahmetbegović sa 23, Naida Glotić sa 13 i Anela Alagić sa 11 poena, Banoviće - Emina Demirović sa 15, Marina Ristić sa 14 i Dženita Ikanović sa 11 poena, a Mladi Krajišnik - Nikolina Zubac sa 32 poena.

# ČELIK JUNIOR POKREĆE ŽENSKI RUKOMETNI KLUB

Škola rukometa "Čelik Junior" koja egzistira sedam godina na prostoru Zenice, a koja je postala pravi brend u rukometnom svijetu, na proteklom sastanku Uprave donijela je odluku o osnivanju ženskog rukometnog kluba. - Prije nekoliko godina ukinut je ŽRK "Čelik", a potom je škola rukometa "Čelik Junior" ponovo pokrenula rad ženskog kluba, te su rezultati bili izvrsni. Dvije godine u nizu bili smo šampioni Lige Srednja Bosna. Međutim, budući da je bilo riječ o juniorskoj selekciji, a koja se nalazila na prekretnici života, klub je prestao s radom zbog odlaska velikog broja igračica na fakultete. Međutim, odlučili smo da ženskom rukometu damo novu priliku, jer naš grad to

zaslužuje. Zaslužujemo svi da imamo i ženski rukomet u gradu sporta, kazali su iz Uprave ŠR "Čelik Junior". Kada je u pitanju godište kojim će se početi rad u ženskom rukometnom klubu, riječ je o djevojčicama 2004./05./06. godište. Trenažni proces počeo je 11. decembra u sportskoj dvorani "Bilmišće". Škola rukometa "Čelik Junior" poziva sve djevojčice uzrasta 10-12 godina da se priključe velikoj rukometnoj porodici, te uživaju u dinamičnom sportu, putovanjima, druženju. Upisati se možete svaki dan u periodu od 09 - 21h pozivom na broj telefona: 062 579 686 (Generalni sekretar). Treninge će voditi glavna trenerica, vrsna rukometka, Afrodita Željko sa svojim pomoćnicima.

**ŠKOLA  
RUKOMETA**

**ŽENSKI RUKOMET JE  
PONOVNO U MODI**

**UPIS NOVIH ČLANOVA  
DJEVOJČICE 8 – 12 god**

**KONTAKT: 062 579 686**  
[www.facebook.com/SRCellJunior](http://www.facebook.com/SRCellJunior)

# ODLIČAN U ŠKOLI I NA KOŠARKAŠKOM TERENU

Desetogodišnji Zeničanin Danko Čvitanović, član zeničkog Kengura, vjerovalno je najperspektivniji igrač u svom uzrastu u Zeničko-dobojskom kantonu. Ako nastavi ovako napredovati, vjeruju trenerski stručnjaci, prednjim je svijetla budućnost u ovom sportu. Na ovogodišnjem Kenguru kupu na kojem je učestvovalo 504 košarkaša i košarkašice iz četiri zemlje igrajući za 42 ekipe u pet

kategorija proglašen je za MVP-a u kategoriji predpionira. - Kosarku treniram tri godine. Prvo je brat Teo krenuo trenirati. Poslije nekoliko mjeseci sam se zaintresovao, pogledao nekoliko treninga i počeo trenirati u Kenguru. Sa mnom su radili treneri Enver Jahić, Jasmin Efendić i Haris Muslić i pomogli mi puno da napredujem u ovom sportu, kazao nam je Danko. Objasnio je da je brat Teo od njega stariji četiri i po godine, da je mlađi kadet i da igra takođe za Kengur. Sretan je što su na Kenguru kupu osvojili zlatnu medalju i što je on izabran za MVP-a u ovoj kategoriji. Kao i svaki mlađi košarkaš ima svog heroja, nekoga od koga upija poteze. A to je ni manje ni više nego NBA košarkaš Stephen Curry iz Golden State Warriorsa. Razlog što voli gledati ovog vrhunskog igrača je što



i on prenosi loptu, igra na poziciji playa ili beka šutera, te upija svaki njegov potez. Pokušava to vježbati na treningu, a potom probati na utakmicama. Najdraži klub u Euroligi mu je Crvena zvezda. - U Kantonalnoj ligi nam dobro ide. Imali smo sedam utakmica i zabilježili svih sedam pobjeda, objasnio je Danko dodavši da se dobro slaže na terenu sa svim suigračima a da može izdvojiti nekoliko prijatelja sa kojima je zajedno krenuo trenirati košarku - Lea Šendulu, Jan Bulajića, Harisa Bećarevića i Isaka Mutapčića. Kaže da je u početku bio malo sebičan u igri, međutim promjenio se. Sada mu je drago koliko i sam da pogoda, da upošljava svoje kolege da i oni postigu poene. Kad je u pitanju škola odličan je učenik 5. razreda OŠ KŠC "Sv. Pavao". Ima sve petice osim likovnog gdje ima četvorku.

## PRIJEM ZA PREDSTAVNIKE WINNERA



Premijer Zeničko-dobojskog kantona Miralem Galijašević i zamjenik predsjedavajuće Skupštine Kantona Jasmin Duvnjak upriličili su zajednički prijem za predstavnike Sportskog društva "Winner" iz Zenice koje su predstavljali

prof. Ermin Zukić, prof. Amir Mahmutović i mr. Josip Dujmović. Tema razgovora je bila upoznavanje sa projektnim aktivnostima i misijom SD "Winner", koje okuplja 320 članova u okviru univerzalne škole sporta, košarkaškog, odbojkaškog, tenis i gimnastičkog kluba, te manifestacijom obilježavanja Dana državnosti Bosne i Hercegovine, kroz 6. Predškolske igre koje su održane 25. novembra u zeničkoj Areni. Premijer Galijašević i zamjenik predsjedavajuće Duvnjak su pohvalili rad profesora tjelesnog odgoja i sporta, te njihovu viziju i strategiju razvoja sporta počev od najmlađeg uzrasta. Također su obećali i direktnu podršku za organizovanje Dana državnosti BiH za djecu i mlade.



## PRIJEM KOD NAČELNIKA

Košarkaški klub Maglaj iza sebe ima historiju uspjeha i talentovane djece koja prve korake u ovom sportu započnu sa trenerima u Maglaju. Sa željom da približe način rada i uspjeh koji su do sada ostvarili, ali i planove koje će u budućnosti nastojati ostvariti, Damir Bašić i Aldin Mehinović, treneri kluba posjetili su zvanično Općinskog načelnika Mirsada Mahmutagića. Razgovarali su o problemima sa kojim se susreću i preprekama koje su često pred njima na putu do uspjeha. Oni te prepreke na sreću, svojim vještinama uspiju prevazići, te ispuniti cilj koji su zamislili. Trener Bašić je istakao da klub treba djeci, jer oni žive za košarku i smatra da se vrijedi boriti za njegov opstanak u svakom smislu. Općinski načelnik Mahmutagić je naglasio da mogu računati na njegovu podršku, u skladu sa mogućnostima koje su pred njim, on će dati sve od sebe da Košarkaški klub Maglaj ima sigurnu budućnost.

## NOVI USPJEH AMARA BORIĆA



Sredinom decembra u organizaciji Plivačkog kluba "Novi Grad" Sarajevo u Olimpijskom bazenu na Otoci održano je međunarodno takmičenje na kojem je učestvovalo 263 plivača iz 20 bh. klubova. Plivački klub "Zenica - Željezara" predstavljali su Amar Borić i Faris Bećić. Juniorski reprezentativac naše zemlje Amar Borić je osvojio dvije zlatne medalje u disciplinama 50 i 100 metara ledno te srebro u disciplini 50 m prsno. Faris Bećić je nakon jednogodišnje pauze postigao zadovoljavajuće rezultate.

# Superinfo

Dijelimo u  
23 Općine  
u tiražu od  
**20.000**  
besplatnih  
primjeraka



Čestit Božić  
i sretna Nova  
2017. godina!

Poštovani, za oglašavanje u Superinfu ili za neki drugi vid poslovne suradnje, kontaktirajte nas  
na: +387 63 046 939; +387 63 046 959; viterapriprema@gmail.com; www.vitera.ba

[info@superinfo.ba](mailto:info@superinfo.ba)  
[www.superinfo.ba](http://www.superinfo.ba)



Čestit Božić  
i  
Nova 2017.  
godina!

SRETAN BOŽIĆ  
I SRETNNA  
NOVA GODINA!

JP "PARKING SERVIS"  
d.o.o. Zenica

Zacarina 23, 72000 Zenica  
Tel/fax: +387 32 406 527  
jpparkingservis@gmail.com

**"SIGMA-SK" d.o.o. Zenica**

Kočevska čikma br.6, 72000 Zenica  
Bosna i Hercegovina  
Tel.: 061/176-259; 063/333-095

# Kako izabratи parfem

**K**ompletan vaš izgled i ponašanje pružaju određenu sliku o vama i pokazuju određen stav prema okolini, a i okolina se na odgovarajući način ponaša prema vama. Pri tome je i korišćenje mirisa neizbežno, prvenstveno zato da biste se prijatno osećali. Ali, morate znati i kako da odaberete odgovarajući miris.

## Postoje neka opšta pravila kojih se trebate pridržavati pri izboru parfema:

- nemojte kupovati miris u kratkim trenucima između jurnjave u vrtić, odlaska na posao ili odlaska u prodavnici. Ako odvojite vreme za kupovinu odgovarajućeg mirisa, vi ćete uštedeti i na vremenu i na novcu i tada vam se neće desiti da imate boćice mirisa sa kojima ne znate šta da uradite.
- kada podlete u kupovinu mirisa, nosite sveže opranu odeću koja na sebi nema zaostalih mirisa. To se posebno odnosi na vunenu ili svilenu odeću na kojoj se lakše zadržavaju stari mirisi.

- miris treba kupovati ujutro jer vaše čulo mirisa nije opterećeno svakojakim mirisima a i parfimerije nisu zasićene raznim mirisima.
- vaše telо ima određeni miris koji zavisi i od hrane koju konzumirate. Zato nemojte ići u kupovinu mirisa ako ste jeli ljutu ili dosta začinjenu hranu.
- pre kupovine novog mirisa nemojte koristiti dezodoranse, pogotovo parfimisane dezodoranse.
- nipošto nemojte kupovate parfem jer vam se sviđa reklama, omot ili ako on na vašoj prijateljici dobro miriše. Parfem različito miriše na svakom pojedincu.
- za vreme probe mirisa, mirište maksimalno 4 mirisa, najbolje iz iste grupe – cvetne, orientalne, drvenaste ili voćne.
- prilikom probe, mirise najpre nanesite na papiriće za testiranje koje lagano pomerate ispred nosa da biste bolje osetili miris. Kada izbor svedete na 2 ili 3 različita mirisa, teka tada ga nanesite na kožu i nemojte ga trljati jer ćete poremetiti mirisnu strukturu.



Nakon nekog vremena (od 15 minuta do 1 sat vremena) vratite se u parfimeriju i kupite taj miris ako vam se još uvek baš taj miris sviđa. Naime, kada prvi put nanesete miris na svoju kožu, osetiće tek gornje ili srednje note mirisa. Bazične note će se razviti nakon sat ili dva vremena.

Parfem mora da se uklapa u vaš životni stil, u vašu životnu filozofiju. Žene često sebi dozvole promene parfema, zbog radoznalosti ili neodlučnosti. Muškarci se, opet najčešće odlučuju za poznat miris.

cm  
 COSMETIC MARKET  
*Mirisna bajka...*

**VERSACE**  
bright crystal eau de toilette 30ml  
**SNIŽENO: -30%**  
prije 89,95KM  
**SADA 62,95KM**

**BURBERRY**  
london woman eau de parfum 30ml  
**SNIŽENO: -35%**  
prije 89,90KM  
**SADA 57,95KM**

**ROBERTO CAVALLI**  
eau de toilette 60ml  
**SNIŽENO: -25%**  
prije 97,50KM  
**SADA 72,95KM**

**GIORGIO ARMANI**  
emporio she eau de parfum 50ml  
**SNIŽENO: -30%**  
prije 127,30KM  
**SADA 88,95KM**

**PACO RABANNE**  
lady million collector  
eau de parfum 80ml  
**SNIŽENO: -35%**  
prije 172,95KM  
**SADA 112,40KM**

Čestit Božić  
i sretna  
Nova 2017. godina!

MARKETI | SUPERMARKETI | MESNICE

**BUBA**  
*commerce*



**JURČEVIĆ**  
DOMAĆIN DOBROG OKUSA

Pratite naše vikend akcije suježeg mesa!

Poslovni Centar 96 | 72250 Vitez | BiH | 030/714-209

Sujež meso svaki dan sa vlastite farme!

Svaki dan svježa  
peciva iz naše pekare!

**BUBA**  
*commerce*

INFO 030/714-209



Poslovni Centar 96 | 72250 Vitez | BiH  
[www.rentacar-buba.ba](http://www.rentacar-buba.ba)

Auto kuća BUBA  
INFO 030/709-019

